

KERATAN AKHBAR

TARIKH : 10 SEPTEMBER 2021

AKHBAR : BERITA HARIAN

Pelabur asing bantu pasaran tempatan pulih

Aliran masuk bersih bulanan cecah RM1.1 bilion Ogos lalu

Oleh Mahanum Abdul Aziz dan Mohd Zaky Zainuddin
bbbiz@bh.com.my

Pasaran saham tempatan pulih secara ketara pada Ogos 2021 selepas mencatatkan prestasi hambar pada separuh pertama tahun ini, demikian menurut Pengerusi Bursa Malaysia Bhd, Tan Sri Abdul Wahid Omar.

Beliau berkata, keadaan itu dibuktikan dengan dana pelabur asing menjadi pembeli bersih buat pertama kali sejak Jun 2019 dengan aliran masuk bersih RM1.1 bilion.

Katanya, penanda aras saham tempatan, Indeks FBM KLCI meningkat 7.1 peratus dari bulan ke bulan untuk ditutup pada paras 1,601 mata pada akhir bulan lalu.

Jelasnya, pemulihan sentimen itu sebahagiannya disokong oleh keuntungan korporat yang kukuh bagi suku kedua 2021 yang meningkat

113 peratus dari asas tahun ke tahun dan tiga peratus dari suku ke suku tahunan.

"Positif sentimen juga dilihat dalam pasaran bon dengan pegangan asing meningkat sebanyak RM6.6 bilion pada Ogos 2021, menjadikan aliran masuk bersih setakat ini kepada RM24.6 bilion.

"Dengan jangkaan pembukaan semula ekonomi sejajar dengan Pelan Pemulihan Negara serta pendekatan perniagaan dan sikap konstruktif kerajaan, kami berharap Malaysia akan pulih dan bangun semula dengan lebih baik," katanya.

Beliau yang juga Pengerusi Majlis Penasihat Kelab Ekonomi Kuala Lumpur (ECKL) berkata demikian pada Sidang Kemuncak Pemulihan Negara dengan tema *Winning the War against COVID - The Road to Recovery* anjuran KSI Strategic Institute for Asia Pacific secara maya semalam.

Abdul Wahid berkata, Bursa Malaysia mencatatkan prestasi yang baik pada 2020 dengan jumlah perniagaan diukur menerusi purata nilai dagangan harian (ADV) meningkat sekali ganda daripada RM1.9 bilion kepada RM4.2 bilion.

Katanya, pada tahun lalu juga menyaksikan Indeks FBM KLCI meningkat 2.4 peratus kepada 1,627 mata, menjadikan pasaran

Dengan jangkaan pembukaan semula ekonomi sejajar dengan Pelan Pemulihan Negara serta pendekatan perniagaan dan sikap konstruktif kerajaan, kami berharap Malaysia akan pulih dan bangun semula dengan lebih baik

Abdul Wahid Omar, Pengerusi Bursa Malaysia Bhd



kedua terbaik serantau.

"Momentum perniagaan berterusan pada separuh pertama 2021 dengan ADV meningkat kepada RM4.4 bilion.

"Bagaimanapun, dengan kes COVID-19 bertambah buruk dan perintah kawalan pergerakan yang berpanjangan, Indeks FBM KLCI susut 5.8 peratus kepada 1,533 mata setakat 30 Jun 2021, menjadikan pasaran mencatatkan prestasi buruk di rantau ini bagi separuh pertama 2021," katanya.